

文淵樓叢書

選學膠言

第十冊

選學膠言目錄

卷十

補亡

南陔

引孟子誤

夷庚

注中曰時二字當去

達人

暗譌晉

七州

豕韋

養由

曹植來朝

詩表注引詩

西館

官號單稱

注引韓詩

聖心

痲腓互易

徐州

道當作連

三命

北京

舊知明牧

三良

秋胡妻

三陟

竹林名士傳

竹林七賢

閉關

一麾

百一

遊仙詩刪

列女傳有脫文

纏牽當作纏牽

首陽

北固

曾是

帆字音

清和不必二月

天雞有二

劉楨京口記

蒜山

東田

修篁

顏沈注詩

趙李之李非李夫人

溢與鎰同

沈休文有媿注語

重韻

阮籍附司馬氏

一人兩用

禍福

太行之行不音杭

絕交書

后邱省文

貧而樂道

七哀

期喪解官

王夫人

趙岐卒歌

井幹

袁子正書

外孫金長齡校字

選學膠言卷十

錢唐張雲璈仲雅述

詩

補亡

東廣徵補亡

南陔白華華黍由庚崇邱由儀序云有其義而亡其辭集傳曰此笙詩也有聲無詩徐檢討管城碩記云儀禮燕禮鄉飲酒禮具有是詩之名所謂升歌三終者工歌鹿鳴四牡皇皇者華也笙入三終者笙奏南陔白華華黍也間歌三終者歌魚麗則笙吹由庚間之歌南有嘉魚則笙吹崇邱間之歌南山有臺則笙



吹由儀間之也合樂三終者歌闕睢則笙吹鵲巢合之歌葛覃則笙吹采蘩合之歌卷耳則笙吹采蘋合之也如以爲笙吹由庚由儀有聲無辭則笙吹采蘩采蘋亦可謂之無辭如以爲笙奏南陔華黍有聲無辭左傳穆叔如晉晉侯享之金奏肆夏之三不拜周禮鐘師注呂叔玉曰肆夏時邁也金奏與笙奏同一詩也豈金奏有辭而笙奏獨無辭乎且南陔一詩在鹿鳴之什而蓼蕭湛露諸詩又在白華之什設使有聲無辭尙可並謂之什乎禮記經解下而象管示事也孔氏疏曰周頌維清奏象武也注云武王制焉則

象武用管有詩明矣鄭夾漈曰若笙詩有聲無辭宜曰笙調不曰笙詩燕禮升歌鹿鳴下管新宮笙入三成左傳昭二十五年宋元公享叔孫昭子賦新宮則管詩有辭矣管詩與笙詩無異豈笙詩獨無辭乎是則笙詩之亡亦猶管詩之亡耳世以斯干爲新宮未必然也卽以斯干爲新宮可見其有辭矣故舊說謂亡其辭亦如商頌十二篇而卒亡其七也雲璈按觀補之一字則其亡失可見亡則可補無則何補東氏當日固不以爲本無其辭也朱子云所以知其篇第在此者意古經篇題之下必有譜焉如投壺魯薛鼓



通學膠言  
之節而亡之耳考投壺之節半於射禮而其爲歌只  
限貍首一詩無天子諸侯大夫士之等其半字以前  
皆射禮之節半字以下則投壺之節○者擊鼓口者  
擊鼙其節未亡似不得以此爲例

德清徐養灝曰詩之目三百五篇而止耳或併笙  
詩數之以爲三百十一篇非也詩有用之堂上者  
有用之堂下者堂上之詩絃歌之堂下之詩則曰  
笙曰管今之詩皆堂上之詩用絃歌而不用笙管  
史記曰詩三百篇孔子皆絃歌之此其明證也言  
笙詩或曰有辭或曰無辭卽使有辭不得與三百

篇竝列鄉飲酒疏云笙歌之詩各自一處故存者  
併存亡者併亡此篤論也

南陔

困學紀聞云東晉補亡詩循彼南陔釋曰陔隴也羣  
經音辨曰序曰孝子相戒以養陔當訓戒鄉飲酒燕  
禮賓醉而出奏陔夏鄭氏注陔之言戒也以陔爲節  
明無失禮與詩序義協愚按春官樂師鄭司農注今  
時行禮於太學罷以鼓陔爲節全氏謝山云相戒以  
養之說精矣然以云南戒則其義難通恐東氏別有  
所據

引孟子誤

養隆敬薄惟禽之似注引孟子曰食而不愛豕交之愛而不敬獸畜之雲璈按詩意正用子游問孝章語當引論語不當引孟子

夷庚

蕩蕩夷庚注毛萇詩傳夷常也孫侍御曰困學紀聞云左傳成十八年披其地以塞夷庚正義謂平道也二字出此注誤辨亡論旋皇輿於夷庚同

注中曰時二字當去

五緯不逆注引尙書云曰雨曰暘曰燠曰寒曰風曰

時五者來備各以其序庶草蕃廡胡中丞云章懷注  
後漢書李雲傳所引史記如此蓋尙書亦然也今以  
東晉古文添曰時二字而誤去曰寒何校增曰寒而  
仍衍曰時未是

達人

謝靈運述祖德

達人貴自我高情屬天雲按左傳聖人有明德者若  
不當世其後必有達人蓋謂其祖予也方氏集成謂  
指下段生等殊謬

暗譌晉

弦高犒晉師晉當依注據呂氏春秋作暗蓋當日傳

寫偶譌五臣直以謝生之誤舊本呂覽亦作晉注亦  
譌但云晉一作暗盧抱經學士據選注以校呂氏本

### 七州

高揖七州外注舜分天下爲十二州時晉有七故云  
七州也孫侍御曰方回文選顏鮑謝詩評曰此指謝  
彖所解徐亮青司冀幽并七州都督耳謂晉有七州  
而高揖其外則不復居晉土耶雲敷按高揖卽謂解  
七州而置身於七州之事外亦無不可非謂居七州  
之外也不居晉土云云說微曲

豕韋

韋孟諷諫

余蕭客云鄭語及杜預左傳注孔穎達春秋正義豕  
韋有二一彭姓祝融後與大彭爲商伯商武丁滅之  
一劉姓堯後彭姓豕韋滅劉姓承其國爲豕韋殷末  
封於唐周武王滅唐遷之杜宣王殺杜伯其子隰叔  
奔晉四世及士會食邑於范氏孟詩云迭彼大彭勲  
績惟光孟五世孫元成作詩自劾責曰赫矣我祖侯  
於豕韋賜命建伯有殷以綏則孟之先爲武丁所滅  
彭姓之豕韋矣孟詩又曰至於有周歷世會同王赧  
聽讒實絕我邦元成詩又曰宗周至漢羣后歷世蓋  
西京內外傳未行故孟與元成詩得肆其鋪張合二



姓豕韋並爲其祖誕妄以欺世也雲璈按王赧聽讒  
二語容齋四筆云周至赧王僅存七邑豈能絕侯邦  
乎容齋蓋謂其誤以武王爲赧王耳

養由

張茂先勵志

養由矯矢獸號於林雲璈按水經汝水下云汝水又  
右迤爲湖俗謂之東長湖湖水下入汝古養水也出  
魯陽縣北將孤山北長岡下數泉俱發東歷永仁三  
堆南又水逕沙川世謂之沙水歷山符壘北又東逕  
沙亭南故養陰里也後漢書郡國志襄有養陰里是  
養乃地名由基蓋以邑爲氏者其後有養由氏故通

志略云養由基之後在由基固止可單稱養也襄十三年左傳但稱養叔而幽通賦止云養遊睥而爰號此云養由似以二字爲複姓而廣韻邑字注直謂楚大夫養由氏皆誤也

曹植來朝

曹子建責躬應詔

注引魏志曰黃初四年植朝京師上疏并獻詩二首雲璈按植本傳裴注引魏略云初植未到關自念有過宜當謝帝乃畱其從官著關東單將兩三人微行入見清河長公主欲因主謝而關吏以聞帝使人逆之不得見太后以爲自殺也對帝泣會植科頭負鉞

鎖徒跣詣闕下帝及太后乃喜及見之帝猶嚴顏色  
不與語又不使冠履植伏地涕泣太后爲不樂詔乃  
聽復王服此與漢梁孝王事無異然植之罪戾未如  
梁孝而不之忌猜有甚漢景其得沒者幸耳

詩表注引詩

困學紀聞云子建表忍垢苟全則犯詩人胡顏之譏  
詩無此句李注引毛詩何顏而不速死也今相鼠注  
亦無之

西館

僻處西館未奉闕庭按本傳文帝責之置西館未許